



ATASSUT

UPA14/135-1

Gerhardt Petersen

25.03.2014

Kalaallit Nunaanni eqqartuussisarnermut inatsisip allanngortinneqarnera pillugu Kalaallit Nunaanni inatsisip atuutsinneqalernernissaanut Namminersorlutik Oqartussat oqaaseqaataat pillugu Inatsisartut aalajangiiffigisassaattut siunnersuut. (Eqqartuussiviit il.il. suliniuteqarfigineqarnerulernissaat)

(Ilaqutariinnermut Inatsisinillu Atuutsitsinermut Naalakkersuisoq)

Kalaallit Nunaanni eqqartuussisarnermut inatsisip allanngortinneqarnera pillugu Kalaallit Nunaanni inatsisip atuutsinneqalernernissaanut Namminersorlutik Oqartussat oqaaseqaataat pillugu Inatsisartut aalajangiiffigisassaattut siunnersuut manna ATASSUT-mit makkuninnga oqaaseqaateqarfigissavarput:

Siunnersuut manna ullumikkut suliarisarput inuiaqatigiit Kalaallinut aammalumi Kalaallit Nunatsinni Eqqartuussiveqarfimmut pingaaruteqarluinnartuuvoq, taamaammatt ATASSUT-mit isummernissatsinnut killitsinnata, siunnersuut peqqissaartumik misissorlugulu suliarivarput. Taamaalilluta aamma Nunatta Eqqartuussisuunerata, Nunatsinni eqqartuussiviit Eqqartuussisuunerata aammalu Kredsdommerit Peqatigiiffiata tusarniaanermut tunngatillugu akissutaat pissarsiariniarsimavagut.

Siunnersuummi tunngavilersuutigineqartut Nunatta Eqqartuussisuunerata, Nunatsinni eqqartuussiviit Eqqartuussisuunerata aammalu Kredsdommerit Peqatigiiffiata tusarniaanermut tunngatillugu akissutaat sanillersuuppagut. Tamatuma malitsigisaanik ajoraluartumik ataatsimut isiginnilluni apeqqutit annertuut uagutsinnullu ATASSUT-mut pingaaruteqartut pilersinneqarput, tassami paasivarput Kalaallit Nunaanni eqqartuussisarnermut inatsisip allanngortinniarneqarnera Soorunami suliat pillugit iluaqutaasussaagaluartoq, taamaattoq, suliassat kinguaattoorutaasut eqqarsaatigalugit naammattumik kivitsisoqarnissaanut suli annikippallaartumik eqqartuussivigut sullissinikkut inissisimassasut.



ATASSUT-miit pingaaruteqartutut maluginiarparput, Inatsiseqarnermut Ministeriap aalajangiinissamut siunnersuutaani inuinnaat saqitsaassutaannut tunngassuteqartut sumiiffinni eqqartuussivinnit avissaartillugit Kalaallit Nunaanni Eqqartuussiveqarfimmut siunissami suliassanngortinneqassasut inassutigineqarpoq.

Isumarput naapertorlugu tamanna assut ajuusaarnarpoq aammalu pissutsit suliassallu annertussusaat aallaavigalugit aalajangiinerit ingerlanneqanngippata, aarleqqutigaarput tamanna sumiiffinni qanimut sullissineq, eqaannerusumillu innuttaasunut kiffartuussineq, sullinneq innarlerneqarsinnaasoq, Nunatsinnimi sumiiffinni eqqartuussiviit aammalu Kalaallit Nunaanni Eqqartuussiveqarfiup sulisoqarniarnikkut ajornartorsiuteqareeqisut ajornerusumik inississinnaanerit ATASSUT-miit aarleqqutigaarput.

Maluginiarparput Nunatta Eqqartuussisuunerata aammalu Kredsdommerit Peqatigiiffiata innersuussutiginnikkaat inuinnaat saqitsaassutaannut tunngasut suliat Nunatta Eqqartuussivianut nuunneqarnissaat, tamatumalu saniatigut Kalaallit Nunaanni Eqqartuussivimmi Eqqartuussisup suliassat taamatut allanngortinneqassappata tamanna tunngavigalugu sulisoqarsinnaasoq oqaatigaluarlugu Kalaallit Nunatsinni eqqartuussiviit allanngortinneqarnerannut atatillugu qanimut sullissisarnerup annikillisinneqarsimanera uparuarpaa.

ATASSUT-miit maluginiarparput Nunatsinni sumiiffinni eqqartuussiveqarfinni dommerit naammattut pigineqalernissaat aammalu suliffimmiiginnarnissaat salliullugu siunnerfilimmik suliniutigineqarnani eqqartuussisut soraarnerit sulilerseqqinneqarnissaannik siunnerfeqartoqartoq aammalu tassunga atatillugu piumasaqaatit ullumikkut annikereersut suli annikinnerulersinneqarnissaat siunniunneqarsimasoq. Nunatsinni eqqartuussisut ilinniartitaanerit eqqarsaatigalugu, ATASSUT-miit ajuusaarnartipparput, maannamut eqqartuussisut ilinniarsimasut amerlassutsit anguniarneqartut suli anguneqarsimangimmata, kaammattuutigissavarpullu qallunaat naalakkersuisuinit tamanna pimoorullugu naammassiniarneqassasoq.

Kalaallit Nunaanni Eqqartuussiveqarfiup aaqqissuussaana Kalaallit Nunaanni Kommunit sisamaannngortinneqarnerannut atatillugu Kommunit aggorneqalersimanerannut naleqqussarlugu allanngortiterneqarsimanera ilumut Kalaallit Nunatsinnut aammalu Kalaallit Nunatsinni



Eqqartuussiveqarfimmut iluaqutaasimanersoq, sulissinikkullu siuariaataasimanersoq suli takussutissaqanngilaq, suliassat suli amerlapput, aammalu kinguaattoorutit sulisoqarnikkut, ilaatigullu angallannikkut akisoqisutigut sullissisunit ilungersuutigineqaraluartut.

Taamaamat ATASSUT-mit kissaatigivarput apeqqutit makku akineqassasut:

- 1) Sooq Nunatta Eqqartuussisuunerata, Nunatsinni eqqartuussiviit Eqqartuussisuunerata aammalu Kredsdommerit Peqatigiiffiata suliassat sumiiffinni eqqartuussiviit aammalu Kalaallit Nunaanni Eqqartuussiviup akornanni agguarneqarnerisa taamaaginnarnissaannik kaammattuutaat tusaaniarneqanngila, tamanna ATASSUT-miit nalilersoqqinneqarnissaa kaammattuutigissavarput.
- 2) Inuit saqitsaassutaannut tunngassuteqartut Nunatta Eqqartuussivianut suliassanngortinneqarnissaat aalajangiunneqassappat iluaqutaasinnaasut ajoqutaasinnaasullu sordiaappat?
- 3) Kalaallit Nunaanni eqqartuussiveqarfinni sulisussanik amigaateqarneq annertoorujussuusoq anigorniarlugu aammalu sulisut pigiinnarnissaannut qanoq suliniuteqartoqarpa?
- 4) 2014-mut 5 mio. Kr.-it, 2015-mut 8 mio. Kr.-it aammalu 2016-mut 7 mio. Kr.-it suliassat amerlavallaalersimanerannut annikillisaanissamut immikkut iliuuseqarnissamut aningaasaliissutigineqarput, taamaattorli aaqqiissuteqartoqanngippat immikkut iliuuseqarneq taanna tassaaginnangila ajornartorsiutinik “qamiterigallarneq” ungasinnerusoq isigalugu iluaqutaassuseqarnavianngitsoq?

ATASSUT-mit isumaqarpugut, eqqartuussiveqarneq tamaat eqqarsaatigalugu tamakkiinerusumik sullissinerullu pitsaassusaanik, aammalu eqqartuussisut, illersuisut, Nunattalu Eqqartuussiveqarfianut sullissinissamut avatangiiseritinneqartut, atugassarititaasullu suliassat pisariaqartitaannut naapertuuttumik aaqqiissuteqarnissaq pillugu Naalakkersuit, qallunaat naalakkersuisui isumasioqatigisariaqaraat.

Taamatullu Kalaallit Nunaanni Eqqartuussisuunerup aammalu sumiiffinni Dommerit Peqatigiiffiata kaammattuutaat, tassalu inuit saqitsaassutaannut tunngasunut sumiiffinni eqqartuussiviit suliarinnittarnerat allannngortinneqassannginnissaanik kaammattuut malinneqassasoq ATASSUT-



ATASSUT INATSIARTUNI

mit sakkortuumik kaammattuutigissavarput, taamatuttaaq Naalakkersuisut kaammattussavagut Inatsisit atortinneqarnerannut Ministeriaqarfimmut naqissuserlugu piunasaqaatigineqassasoq pissutsit atuuttut tunngavigalugit Nunatsinni eqqartuussiveqarnermut tunngatillugu suliaqarnertik ingerlattassagaat minnerunngitsumillu Nunatsinni eqqartuussivimmut tunngatillugu suliaqassatillutik siusissukkut Nunatsinni eqqartuussiveqarnermut tunngatillugu suliaqartut attuumassuteqartut suleqatigineqartarnissaat isumagineqartassasoq.

ATASSUT-miit taamatut oqaaseqarluta, siunnersuutip aappassaaneerreqannginnerani Inatsiseqarnermut Ataatsimiititaliami suliarineqassasoq innersuussutigissavarput.